

खबरां

- सरकारै पच्छिम एशिया संकट दे चलदे प्रमुख खेत्तरें आस्तै कुदरती गैस दी आपूर्ति बनाई रखने आस्तै जरूरी चीजें बस्ते सरबन्धी अधिनियम लागू कीता। सरकार नै घरेलू इसतेमाल लेई एल.पी.जी उत्पादन बढ़ाने लेई तेल रिफाइनरिएं गी निर्देश दित्ते।
- लोकसभा च अध्यक्ष ओम बिरला होरें गी औहदे थमां हटाने लेई प्रस्ताव पर चर्चा शुरू।
- सुप्रीम कोर्ट नै निर्वाचन आयोग गी पच्छिम बंगाल च एस.आई.आर प्रक्रिया च न्यायिक अधिकारिएं दे फैसले खलाफ अपीलें पर बचार करने आस्तै इक निकाय कायम करने दे निर्देश दित्ते।
- दिल्ली हाई कोर्ट नै आबकारी नीति मामले च प्रवर्तन निदेशालय दी याचिका पर दिल्ली दे साबका मुख् मंत्री अरविंद केजरीवाल सने सारे सरबन्धी लोकें गी नोटिस जारी कीता ऐ।
- मौसम विभाग नै जम्मू-कश्मीर, लद्दाख च बरखा ते गुजरात, कोंणन, कोवा ते विदर्भ ते राजस्थान च ला चलने दी पेशगोई कीती ऐ।
- ते स्विस ओपन बैडमिंटन प्रतियोगिता अज्जै थमां बेसल च शुरू।

<><><><><><>

Essential Commodities Act

पच्छिम एशिया च मौजूदा स्थिति गी दिखदे होई सरकार नै तरजीह आहले क्षेत्रें आस्तै कुदरती गैस दे उत्पादन गी नियमित करने, आपूर्ति गी बनाई रखने, समान दी बंड ते उपलब्धता यकीनी करने आस्तै जरूरी चीजें-बस्ते सरबन्धी कनून 1955 गी लागू कीता ऐ। पेट्रोलियम ते कुदरती गैस मंत्रालय दी अधिसूचना मूजब घरेलू पाइपलाइन कुदरती गैस आपूर्ति परिवहन आस्ते सी.एन.जी, एल.पी.जी उत्पादन, पाइपलाइन कम्प्रेसर, ईंधन ते होर दुए जरूरी पाइपलाइन परिचालन आहले क्षेत्रें गी कुदरती गैस दी आपूर्ति गी तरजीह दित्ती गेई ऐ। अधिसूचना च आखेआ गेआ ऐ जे आपूर्ति गी पिछले 6 म्हीनें दी औसत गैस खपत दे 100 फीसद परिचालन उपलब्धता दे आधीन बनाई रखेआ जाहगा।

<><><><><><>

LPG-Productions

मौजूदा भू-राजनीतिक तनाव कारण ईंधन दी सप्लाई पर पवा'रदे माडे असर गी दिखदे होई पेट्रोलियम ते कुदरती गैस मंत्रालय नै तेल रिफाइनरियें गी एलपीजी उत्पादन बढ़ाने दे निर्देश दित्ते न तां जे घरेलू जरूरतें गी विजन कुसै रूकावट दे पूरा कीता जाई सकै। मंत्रालय दा आखना ऐ जे उन्नै घरेलू उपभोक्ताएं लेई एलपीजी आपूर्ति गी प्राथमिकता दित्ती ऐ। कन्नै गै जमाखेरी दे कालाबजारी गी रोकने लेई सिलेंडर दी 2 बुकिंग बश्कारें समेंसीमा गी बधाइयै 25 दिन करी दित्ता गेआ ऐ। पैहले उपभोक्ता 25एं दिनें दे अंदर-अंदर 2 सिलेंडर बुक कराई सकदे हे पर हून इस दरान छडी इक गै सिलेंडर दी बुकिंग दी मंजूरी होग।



Tejasvi Energy Security

भाजपा तेजस्वी सूर्या होरें आखेआ ऐ जे पच्छिम एशिया दी मौजूदा स्थिति गी दिखदे होई सरकार नै मुलख दी उर्जा सुरक्षा यकीनी करने आस्तै लोडचदियां गैंऽ पुट्टियां ना। संसद परिसर च उनें आखेआ जे सरकार नै बार-बार भरोसा दोआया ऐ जे मुलख दी उर्जा सुरक्षा सभनें थमां पैहली प्राथमिकता ऐ। उनें आखेआ जे पेट्रोलियम ते कुदरती गैस मंत्री हरदीप सिंह पुरी निजी तौर पर इस घटनाक्रम पर नजर रक्खा'रदे ना। जनता दल यूनाइटेड सांसद संजय कुमार झा होरें आखेआ जे पच्छिम एशिया च जारी संघर्ष करी वैश्विक उर्जा बजारें च यक्को-तक्की आह्ला म्हौल ऐ।



SEBI-Market

पच्छिम एशिया च बददी तनोतनी ते अस्थिरता आहली स्थिति दे चलदे SEBI दे चेयरमैन तुहिन कांत पांडे होरें निवेशकें गी शांत रौहने ते काहली-काहली च फैसलें नेंई लैने दी अपील कीती ऐ। उनें आखेआ कि भारत दे घरेलू बुनियादी कारक मजबूत न जेहडे इस चाली दी यक्को-तक्की आहली स्थिति च लचीलापन प्रदान करदे ना। इस करियै ओ काहली-काहली च निवेश वापस लैने जनेई गलती नेंई करना।



Trump Iran War

अमरीका दे राष्ट्रपति डोनाल्ड ट्रम्प होरें आखेआ ऐ कि ईरान खलाफ लड़ाई दी अवधि घट्ट होई सकदी ऐ। उनें इस्लामिक रिपब्लिक आसेया दुनिया च तेल दी सप्लाई रोकने दी स्थिति च लड़ाई तेज ते लम्मी खचोने दी संभावना थमां बी इंकार नेंई कीता ऐ। ट्रम्प होरें आखेआ कि ईरान युद्ध बडी तौले खत्म होई जाहग- पर कन्नै गै इब्बी आखेआ कि अमरीका नै अजें लोडचदी पूरी जित्त हासल नेंई कीती ऐ ते फैसलाकुन मुकदी जित्त दा लक्ष तयार करा करदा ऐ। ट्रम्प होरें मियामी कश रिपब्लिकन दे सांसदें गी आखेआ कि किश कठनाइयें पर काबू पाने लेई अमरीका नै पच्छिम एशिया च एह अभियान चलाया ऐ। ट्रम्प होरें अगो आखेआ कि अमरीका- ईरान दे बैलिस्टिक मिसाइल भंडार ते इन मिसाइलें दी दागने ते इंदे उत्पादन सरबंधी छमता गी खत्म करने दे लक्ष दे कोल-कच्छ पुज्जै करदा ऐ।



LS Speaker Reomval

लोकसभा च अध्यक्ष ओम बिरला होरें गी औहदे थमां हटाने बारै चर्चा शुरू होई। दपैहरी 12 बजे पैहले स्थगन मगरा कार्रवाई शुरू होने पर कांग्रेस सांसद डॉ. मोहम्मद जावेद होरें एह प्रस्ताव पेश कीता। उनें आखेआ जे अध्यक्ष होरें सदन च विपक्ष दे नेता सने होरनें विपक्षी नेताएं गी बोलन नेई दित्ता ते विपक्ष दी महिला सांसदें पर बेबुनियाद आरोप लाए। पीठासीन अधिकारी जगदंबिका पाल होरें सदस्यें गी जानकारी दित्ती जे प्रस्ताव पर चर्चा आस्ते 10 घंटे दा समां दित्ता गेआ। चर्चा दी शुरूआत करदे होई कांग्रेस दे गौरव गोगोई होरें आखेआ जे सदन च विपक्ष दे नेता राहुल गांधी होरें गी राष्ट्रपति हुंदे अभिभाषण पर धन्नवाद प्रस्ताव पर उन्दे भाषण दरान अध्यक्ष होरें बारी-बारी बाधित कीता। उनें आखेआ जे अध्यक्ष होरें सदन दी कार्रवाई दरान पक्खपात आह्ला बवहार कीता।

RS Reports

राज्यसभा दी कार्रवाई अज्ज केंद्री मंत्रिण् आसेआ उन्दे मंत्रालयें ते विभागें दी रिपोर्ट पेश करने दे कन्नै शुरू होई। सदस्यें संसदीय समितिण् दी रिपोर्ट बी सदन च पेश कीती। शून्यकाल दरान तृणमूल कांग्रेस सांसद डेरेक ओ ब्रायन होरें पच्छिम बंगाल सने बक्ख-बक्ख राज्यें च निर्वाचन आयोग आसेआ कीते गेदे मतदाता सूचि दी बशेष ते गहन नजरसानी पर र्चा दी मंग कीती। विपक्ष दे नेता मल्लिकार्जुन खड्गे होरें बी सदन च चुनावी सुधारें पर बहस दी मंग कीती।

<><><><><><>

SC-ECI

सुप्रीम कोर्ट नै निर्वाचन आयोग ते पच्छिम बंगाल सरकार गी राज्य च चला'रदी खास ते गहन नजरसानी एस.आई.आर च शामिल न्यायिक अधिकारिण् गी पूरी चाल्ली न्यायिक सहायता प्रदान करने दा निर्देश दित्ता ऐ। शीर्ष अदालतै पीठ गी आखेआ जे उच्च न्यायालय दे मुख् न्यायाधीशें ते उच्च न्यायालय दे न्याधीशें दी इक पीठ कायम करी सकदे ना। पीठ नै निर्वाचन आयोग दे फैसले खलाफ अपीलें पर बचार करने आस्तै इक निकाय कायम करने लेई अधिसूचना जारी करने दा निर्देश दित्ता।

<><><><><><>

WB-Voting

निर्वाचन आयोग नै अज्ज कोलकाता च पच्छिम बंगाल दे मुख् चुनावी अधिकारी, राज्य ते केंद्री रिजर्व पुलस बल दे नोडल अधिकारिण् कन्नै चुनावी तयारिण् पर बैठक कीती। बूथ सतह दे अधिकारिण् कन्नै गल्लबात मगरा संवाददाता सम्मेलन च मुख् चुनावी आयुक्त ज्ञानेश कुमार होरें दस्सेआ जे सारे सरबन्धी धडें कन्नै चुनावी सरबन्धी तयारिण् दी व्यापक समीक्षा कीती गेई। औने आहले पच्छिम बंगाल दे चुनावी लेई चुनावी आयोग दो दिन थमां उत्थे ऐ। कुमार होरें आखेआ जे पच्छिम बंगाल च निपरक्ख ते शांतिपूर्ण मतदान कराया जाहगा। उनें साफ कीता जे निर्वाचन आयोग मतदाताण् गी डराने धमकाने दी घटनाण् गी बर्दाश्त नेई करोग।

<><><><><><>

Nadda WB Govt.

राज्यसभा च सदन दे नेता जे.पी नड्डा होरें पच्छिम बंगाल सरकार दी सख्त निंदेआ करदे होई आखेआ जे राज्य च लोकतांत्रिक मूल्लें ते कनून दा शासन कमजोर कीता जा'रदा ऐ। प्रश्नकाल दरान उनें आखेआ जे पच्छिम बंगाल दी चर्चा इस करी होआरदी ऐ कीजे एह इकमात्र ऐसा राज्य ऐ जित्थे कनून दा शासन बेमानी होई गेआ ऐ। नड्डा होरें दावा कीता जे लोकतांत्रिक प्रक्रियाण् ते राजनीतिक मानदंडें दा कोई सम्मान नेई ऐ। उनें राज्य नेतृत्व पर राष्ट्रपति हुंदे औहदे दा अपमान करने दा बी दोष लाया। अपने संबोधन च महिला मुख्मंत्री हुंदा नां लेते बगैर उनें आखेआ जे एह मंदे भागें आहली गल्ल ऐ जे इक महिला मुख्मंत्री नै राष्ट्रपति औहदे दा अपमान कीता ऐ जेडी मुख् दी पैहली जनजातीय राष्ट्रपति बी ऐ।

<><><><><><>

SEC Electoral Rolls

प्रदेश चुनाव आयुक्त शांतमनु होरें सारे डिप्टी कमीशनरें ते मतलका अफसरें कन्नै इक बैठक लाई। इस दौरान जम्मू-कश्मीर च मतदाता सूचियें दी नज़रसानी बारे चर्चा कीती गई। उनें जम्मू-कश्मीर च योग्य मतदाताएं दे पंजीकरण करने ते इस प्रक्रिया गी सुचारू बनाने पर जोर दिता। चुनाव आयुक्त होरें योग्य मतदाताएं गी अपील कीती जे ओह अपने नांs मतदाता सूचियें च शामिल करोआन। इस दौरान एह जानकारी बी दिती गई जे योग्य मतदाताएं दी Qualifying तरीक पैहली अप्रैल 2026 रक्खी गेदी ऐ।

<><><><><><>

SC-UCC

सुप्रीम कोर्ट नै आखेआ जे समान नागरिक संहिता यू.सी.सी लागू करने दा समां आई गेआ ऐ। सुप्रीम कोर्ट नै 1937 च शरिया कनून दे प्रावधानें दे हवाले राएं मुस्लिम महिलाएं कन्नै फर्कोफर्की दस्सदे होई निरस्त करने दी याचिका गी इक खरा मामला दस्सेआ ते आखेआ जे इस पर छड़ा विधायिका गी गै बचार करना चाइदा। मुख न्याधीश न्यायामूर्ति सूर्यकांत ते न्यायमूर्ति जायमाल्य बागची ते न्यामूर्ति आर. महादेवन हुंदी पीठ नै आखेआ जे शरिया उत्तराधिकार कनून गी निरस्त करने कन्नै इक कनूनी खल्ला पैदा होई जाहग कीजे मुस्लिम उत्तराधिकार गी नियंत्रित करने आह्ला कोइ वैधानिक कनून नेई ऐ।

<><><><><><>

Delhi HC Notice

दिल्ली हाई कोर्ट नै अज्ज प्रवर्तन निदेशालय दी दायर याचिका पर दिल्ली दे साबका मुखमंत्री अरविंद केजरीवाल ते साबका उपमुखमंत्री मनीष सिंसोदिया सने होरनें सरबंधी दुएं गी नोटिस जारी कीता ऐ। अदालतै अगली सुनवाई दी तरीक 19 मार्च तय करदे होई आखेआ जे इस मामले च स्हेई अंतरिम आदेश पारित कीता जाहग। प्रवर्तन निदेशालय नै आबकारी नीति आहले मामले च अरविंद केजरीवाल, मनीष सिंसोदिया ते होरनें आरोपिएं गी बरी करदे होई हेठली अदालत आसेआ निदेशालय खलाफ कीती गेदी प्रतिकूल टिप्पणिएं गी हटाने आस्तै दिल्ली हाई कोर्ट च याचिका दायर कीती ऐ।

<><><><><><>

PM-Visit

प्रधानमंत्री नरेन्द्र मोदी होर कल केरल ते तमिनाडू दे दौरे पर होगंन। केरल च ओ दिने डेढ बजे अरनाकुलम च 10 ज्हार 800 करोड़ रपे दी लागत आहलियें बक्ख-बक्ख परियोजनाएं चा किश दा उदघाटन करगंन- केइयें दा नींह पत्थर रखगंन ते किश गी राष्ट्र दे नमित करगंन। एहदे इलावा किश परियोजनाएं गी ओह झंडी दस्सियै उन्दी शुरुआत बी करगंन। एहदे मगरा उन्दा समारोह गी सम्बोधित करने दा बी कार्यक्रम ऐ। मगरा तमिलनाडू च प्रधानमंत्री मोदी होर 5 ज्हार 650 करोड़ रपें दियें बक्ख-बक्ख परियोजनाएं दा नींह पत्थर ते उदघाटन करगंन। उत्थै बी ओ इक जनसभा गी सम्बोधित करगंन।

<><><><><><>

Goyal-AAHAR

उद्योग ते बपार मंत्री पीयूष गोयल होरें अज्ज नमीं दिल्ली च आहार अंतरराष्ट्री खाद्य ते आतिथ्य मेले दे 40में संस्करण दा उद्घाटन कीता। खाने-पीने आहली चीजें गी डब्बा बंद करने सरबन्धी मंत्रालय ते भारती बपार सर्वधन संगठन सांझे तौरा पर 10 थमां 14 मार्च तगर इस मेले दा आयोजन करा'रदा ऐ। मीडिया कर्मिं कन्नै गल्ल करदे होई केंद्री मंत्री होरें भरोसा दोआया जे इस चाल्ली दियां प्रदर्शनियां भारत गी मुक्त बपार समझौते राएं थ्होए दे मौकें दा लाह ठोआने च मदद थ्होग। उनें दस्सेआ जे भारत अज्ज दुनिया दा 7मां सभनें थमां बड्डा निर्यातक ऐ। गोयल होरें आखेआ जे राईबाई ते समुंद्री उत्पादें च मुख दे करसान ते मछुआरें करीब 5 लक्ख करोड रपे दे उत्पाद निर्यात करा करदे ना। केंद्री मंत्री होरें दस्सेआ जे इटली गी पैहली बारी मेले च भ्याल मुख बनाया गेआ ऐ।

<><><><><><>

Chouhan Food Grain

केंद्री राईबाई मंत्री शिवराज सिंह चौहान होरें आखेआ ऐ जे पिछले 10 बरें च देशै च अन्नदाने दे उत्पादन च 44 फीसद दा बाद्दा दर्ज होआ ऐ। लोकसभा चप्रश्नकाल दरान जिमनी सोआलें दा परता दिंदे होई चौहान होरें आखेआ जे देस नै 357 करोड टन दे अन्नदाने दे उत्पादन राएं महत्वै आहली उपलब्धि हासिल कीती ऐ। उनें आखेआ जे अन्नदाने दे उत्पादन च संतुलित बाद्दा यकीनी करने आस्तै प्रधानमंत्री जन धन धान्य योजना मुख भरै दे 100 जिलें च लागू कीती गेई ऐ पर पच्छिम बंगाल सरकार नै इस योजना गी लागू नेई कीता ऐ।

<><><><><><>

IMD

मौसम विभाग नै अज्ज जम्मू-कश्मीर ते लद्दाख ते मुजफ्फराबाद च तेज बरखा पौने दी पेशगोई कीती दी ऐ। बहार, पच्छिम बंगाल, अरूणाचल प्रदेश ते केरल च बिजली चमकने ते तेज हव चलने दी मेद ऐ। मुखे दे उत्तर पूर्वी हिस्सें च बी इयै नेहा मौसम रौहने दी आशंका ऐ। गुजरात, कोंकण, गोवा, विदर्भ ते राजस्थान च लू दी मेद जताई गेई ऐ। मध्य महाराष्ट्र ते मराठवाडा च दिन भर मौसम गर्म ते उमस आहला रेआ।

<><><><><><>

CISF-Greetings

उपराष्ट्रपति सी.पी राधाकृष्णन ते प्रधानमंत्री नरेंद्र मोदी होरें केंद्री औद्योगिक सुरक्षा बल दे स्थापना दिवस पर सारे कर्मिं गी बदाई दिती ऐ। सोशल मीडिया दी इक पोस्ट च उपराष्ट्रपति होरें आखेआ जे राष्ट्र दे महत्वपूर्ण बुनियादी ढांचे ते सार्वजनिक संस्थानें दी सुरक्षा प्रति सी.आई.एस.एफ दा समर्पण ते अटूट प्रतिबद्धता सराहनीय ऐ। प्रधानमंत्री होरें आखेआ जे सी.आई.एस.एफ मुख भरै च बुनियादी ढांचे दी सुरक्षा च महत्वपूर्ण भूमिका निभांदी ऐ।

<><><><><><>

LG –CISF Raising Day

उपराज्यपाल मनोज सिन्हा होंरें केन्द्रीय औद्योगिक सुरक्षा बल CISF दे कर्मियों ते उं'दे परोआर आलें गी बल दे स्थापना दिवस दे मौके पर मुबारकबाद ते शुभकामनां दितियां ना। अपनी इक सोशल मीडिया पोस्ट पर एल.जी होंरें मुल्खे दे महत्वपूर्ण संस्थानें ते ढांचे दी रक्षा लेई CISF दी निष्ठा, बहादुरी ते समर्पण भाव दी सराहना कीती ऐ ते आखेआ जे इस बल दी सेवा ते बलिदान दे जजबें दा कोई मुकाबला नेंई ऐ। CISF दी दलेरी ते ज्यूटी प्रति निष्ठा गी उजागर करदे होई मनोज सिन्हा होंरें आखेआ जे समूलचे मुल्खा गी इस बल पर मान ऐ। उं'नें इस मौके राश्ट्र दी रक्षा ते सार्वजनिक सुरक्षा गितै CISF दे अनथक जतनें गी बी नमन बी कीता।

<><><><><><>

Pak-Drone

साम्बा जिले च अंतरराश्ट्री बन्ने कश पाकिस्तानी ड्रोन दी संदिग्ध गतिविधि दी सूचना थहोने पर सुरक्षाबलें अज्ज अभियान शुरू कीता। स्हाड़े संवाददाता मुजब कल चिरे रातीं दबोह इलाके दे आले-दोआले इक्क संदिग्ध दुश्मन ड्रोन दी गतिविधि दिक्खी गई जेदे बाद सुरक्षाबलें जवाबी कार्रवाई शुरू करी दिती। इनें कारवाइयें च अतिरिक्त बलें दी तैनाती ते इलाके दी गहन तपाशी चला'रदी ऐ तां जे यकीनी कीता जाई सकै जे कोई थेआर जा नशीले पदार्थ ब्हाई रस्ते थमां नेंई सुट्टे गे होना। ड्रोन दिक्खे जाने दी सूचना प्राप्त क्षेत्र च सेना, पुलस ते बी.एस.एफ आसेआ संयुक्त तपाशी अभियान चलाया जा'रदा ऐ। जिले दे राजपुर क्षेत्र च भाई नाला, लाला चक ते मलानी च बी तपाशी अभियान चलाया गेआ ऐ।

<><><><><><>

Swiss-Open

स्विस ओपन बैडमिंटन प्रतियोगिता अज्ज थमां स्वित्जरलैंड दे बेसल शैहर च शुरू होई। प्रतियोगिता च भारत आसेआ एच.एस प्रणय ते किदांबी श्रीकांत चुनौती पेश करडन। दो बारी दी ओलंपिक पदक विजेता पी. वी सिंधू इस प्रतियोगिता च हिस्सा नेंई लै'रदियां ना।

<><><><><><>